



Gabinete Wever - Croes II

# ISLAONLINE


Noticia di Gobierno

2023

Diaranson 14 Juni 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





**Diahuebs 15 di juni**

## **SINTONISA 'PERIODISTA PA UN DIA'**

**Via TeleAruba y riba pagina di Facebook di Gabinete Wever-Croes**



E siguiente atardi di 'Periodista Pa Un Dia' den e di dos edicion di Conferencia Hubenil ta tuma luga diahuebs 15 di juni. Aki, 6 mucha di difente scol y edad, cu desde hopi tempran a registra pa participa, lo haya e oportunidad pa conoce Prome Minister Evelyn Wever-Croes y haci nan preguntanan na Prome Minister den e sala di conferencia di Gobierno di Aruba. Pa nos muchanan cu no ta participa y pueblo en general, por wak Periodista Pa Un Dia via TeleAruba y riba pagina di Facebook di Gabinete Wever-Croes.

E bunita di e Proyecto aki ta, Prome Minister a expresa, ta cu nos muchanan ta hopi interesa. Esaki por conclui di e preguntanan cu nan ta haci tambe na Prome Minister. Algun pregunta ta senciu y algun un tiki mas dificil, pero Prome Minister ta contesta cada un di nan. E meta di Periodista pa un Dia ta pa nos muchanan for di un edad hopi young cera conoci cu e trabou di periodismo.

Cada siman, un periodista di TeleAruba ta wordo invita pa asina nan conta e muchanan un tiki di e trabou di periodismo y nan experencianan como periodista, y tambe nan ta prepara e muchanan pa e Conferencia di Prensa Hubenil Live. E prome periodista invita tawata Andrew Vrolijk, e di dos tawata Patrick



Everon y e siman aki señora Alejandra Forero ta esun invita pa guia nos muchanan e atardi aki prome cu nan bay sala di Consejo di Minister pa topa cu Prome Minister.

Prome Minister ta gradici tur mayor pa permiti nan yiunan registra pa e programa aki, y e scolnan tambe pa stimula nos muchanan pa participa. Principalmente, danki na nos muchanan cu tin interes pa ta Periodista pa un Dia. "E muchanan ta sorprende mi den e forma cu nan ta prepara y e interes cu nan tin. Pa mi ta un gran honor y placer di por contribui na e desaroyo di nos muchanan den nos comunidad".



**Prome Minister Evelyn Wever-Croes:**

# **PROME MINISTER A BISHITA EDUCAMPUS PA ADMIRA E PROYECTO INNOVATIVO CU NAN A GANA CU E PROYECTO DI EDUTECH**



Diaranson mainta, Prome Minister Evelyn Wever-Croes a bishita Educampus, cu ta un otro scol cu a gana e proyecto di Edutech. Educampus compara cu otro scolnan na Aruba, tin un otro sistema di duna les pa prepara e muchanan den enseñansa. Nan ta traha cu un sistema hopi innovativo basa riba e sitsema mericano cu cierto "aansluiting" na e sistema hulandes. Tin hopi interes di parti di alumnonan pa drenta e scol aki, pero debi na capacidad limita, tin un lista di espera basta largo.

Educampus a inscribi na e proyecto di Edutech pa asina logra yega na un "makerspace", cu ta un container cu nan lo cambia y na unda nan lo trece tur e "tools" nan digital cu mester. Esaki sigur ta di gran beneficio pa e muchanan, mirando cu e lo stimula nan pa pensa na un forma innovativo. Mirando e avansenan den e mundo digital, nos no sa kico lo ta e trabounan cu lo tin mayan pa e futuro generacion. P'esey ta importante pa bin cu proyectonan asina, cu lo duna nos muchanan e habilidadnan necesario pa nan por ta exitoso mayan.

Prome Minister ta felicita Educampus cu e proyecto importante y bunita aki, y a gradici nan pa e confiansa den e proyecto di EduTech. Pa haci e proyecto di innovacion aki posibel, Gobierno a aloca un suma di 400 mil florin, cu lo wordo dividi den 4 tranche. Pa e prome dos tranchenan, un total di 15 scol a inscribi di cual 6 a wordo eligi. Pa e scolnan aki un total di 200 mil florin a wordo aloca. Pa e di tres tranche, a inscribi 10 scol y e huradonan ta den proceso pa wak cua ta e scolnan ganador pa e 100 mil florin aki. Pa e di e cuater y ultimo tranche pa e aña aki, inscripcion ta cera e luna aki, pues ainda tin oportunidad pa scolnan participa.

"Mi ta extende un invitacion na tur e scolnan na Aruba pa bin cu un proyecto innovativo, inscribi esaki y wak asina si bo scol por bira ganador pa ricibi fondo pa e proyecto innovativo desea. Danki na tur scol cu a participa caba na e proyecto aki, y danki na Futura cu a traha duro pa haci esaki posibel" Prome Minister a expresa.





# RESUMEN DI SIMAN

Asuntonan General,  
Innovacion,  
Organisacion Gubernamental,  
Infraestructura y  
Planificacion Teritorial

**PROME MINISTER, EVELYN WEVER-CROES**

**3 - 10 di juni, 2023**



• **PROME SIMAN DI SEGUNDO EDICION DI PERIODISTA PA UN DIA**

Prome Minsiter Evelyn Wever-Croes diabierna atardi a ricibi 5 mucha di scol basico pa asina duna nan e oportunidad pa ta Periodista pa un Dia den sala di prensa di Gobierno di Aruba. Den e sala di Conferencia di Prensa di Gobierno di Aruba, señor Andrew Vrolijk, di TeleaAruba a splica e muchanan kico ta periodismo. Loke cu Gobierno kier ta pa nos muchanan ta mas involvi cu gobernacion y scucha mas di nos muchanan y pa nos muchanan tambe scucha mas di Gobierno.



• **PRESENTACION CKV DAG MARIA COLLEGE**

Diamars mainta, Prome Minister Evelyn Wever-Croes tawata presente na Cas di Cultura na unda cu Maria College a organisa e Culturele Kunstzinnige Vorming Dag (CKV) caminda cada klas a presenta resultado di trabounan practico di henter e aña. E show a cuminsa na un manera hopi imprecionante cu algun hoben alumno y ex alumno di Maria College y tambe docentenan cu a duna un bunita show pa e alumnonan. Alumnonan a presenta baile y canto brindando un mainta hopi ameno y bunita.



• **BISHITA DI THE HAT LADIES DI CORSOU**

The Hat ladies, di nos hermana isla di Corsou a bishita Premier Wever-Croes, un un grupo di damas hopi elegante, un grupo di damas social cu profesionalnan cu ta hasi diferente obra caritativo pa nan comunidad y cu hopi amor. Tambe ta pone nos damanan den funcionnan prominente den lus positivo. intercambia informacionnan riba diferente tema di hende muhe cu e islanan tin en comun. Pero principalmente e damanan a bin gradici Prome Minister, como un hende muhe, pa e trabou cu e ta haciendo pa Aruba.



• **BISHITA ATLETANAN RONDE VAN ARUBA**

TProme Minister conhuntamente cu Minister Endy Croes a ricibi Brainer Lampe, Gerald Moreta y Disjonrick Jacobs riba su cumpleaños pa entrega un reconocimiento pa e hazaña inmenso durante Ronde van Aruba den cual Brainer y Gerald a core 72.2 km hunto cu Disjonrick cu ta den rolstoel haciendo su sueño bira un realidad. Nan a comparti nan experiencia, sigur un inspiracion pa nos tur. Un reconocimiento bon mereci!





Asuntunan General,  
Innovacion,  
Organisacion Gubernamental,  
Infraestructura y  
Planificacion Teritorial  
PROME MINISTER, EVELYN WEVER-CROES



#### • REUNION ANA

Prome Minister tabata tin un encuentro cu stakeholders riba e tema na Archivo Nacional Aruba (ANA) riba e tema: Historia di Sclavitud na Aruba. Ta trahando riba plannan pa conmemora e fecha 1 di juli di 150 aña cu a aboli sclavitud na Aruba.



#### • REUNION CU SNBA

Prome Minister y Minister di Husticia a reuni cu San Nicolas Business Association - SNBA riba diferente proyecto pa San Nicolas. Seguridad, iluminacion, hotel, Baby Beach, carnival village.



#### • CONFERENCIA DI PRENSA TOPICO IMF

• Prome Minister a elabora riba e evaluacion financiero y economico positivo di IMF. IMF a remarca cu e recuperacion di Aruba ta impresionante. importante pa menciona ta cu GDP a crece, Debe a baha, desempleo a baha y inflacion ta bahando y tin crecimiento economico.

• Prome Minister a trata e topico di BBO na frontera y simplificacion impuesto riba importacion. Pa mas informacion bishita e pagina di Gabinete Wever - Croes.



Gabinete Wever-croes II



#### • 5 AÑA PLATAFORMA VEILIGHEIDSHUIS

E Siman aki Prome Minister Evelyn Wever - Croes tabata presente na celebracion di Plataforma Veiligheidshuis cu ta cumpliendo 5 aña. E sala tabata yena cu profesionalnan di area social, area di husticia y area di salubridad. Prome Minister a gradici e profesionalnan pa e bunita trabou cu nan a haci.



#### • REUNION CU CMMA

Prome Minister a reuni cu Coordinatie Centrum Mensenhandel Mensensmokkel Aruba (CMAA) cu ta encarga cu trabounan den cuadro di trafication di hende, pa ricibi nan jaarverslag cu ta encera tur e tareanan cu nan a haci cual ta impresionante.





# NOS STUDIAANTENAN A DEMOSTRA TALENTO DURANTE COMPETENCIA DI BAILE DEPORTIVO Y CULTURAL ESCOLAR 2023

## Danki y Pabien na tur scol participante y ganador

Diasabra ultimo Minister di Cultura Xiomara Maduro tabata presente na e Competencia di Baile Deportivo y Cultural di Weganan Escolar We Aruba cu a tuma luga na Aruba Entertainment Center na Dakota. Un publico grandi di nos muchanan di scol hunto cu mayornan y demas publico a presenta un bunita competencia di talento y coreografia di bailenan cultural y moderno entre diferente scol.

Minister Xiomara Maduro di Cultura a hiba palabra na un y tur presente y a trece dilanti cu pa su persona ta un honor di por ta presente pa dirigi palabra na un evento special caminda nos muchanan di scol ta demostra nan talento den baile, despues cu dos siman largo scolnan a bataya den competencia deportivo di Weganan Escolar 2023. Esaki ta e di dos competencia di Baile Deportivo y Cultural di Weganan Escolar, aña pasa esaki a tuma luga den Cas di Cultura, cual a resulta un exito grandi, un Cas di Cultura completamente yen y hasta un cantidad di persona mester a keda pafo pasobra no tabata tin mas espacio. Mirando esaki a dicidi di haci esaki den un espacio mas grandi y brinda oportunidad pa mas persona por disfruta di esaki y apoya nos talentonan escolar. E mandatario a expresa cu como Minister di Cultura e ta hopi contento y orguyoso di mira nos muchanan participa den competencia cultural, den e caso aki baile, asina demostrando nan aprecio pa locual ta e cultura di nos país, pero tambe caminda nan ta presenta nan talento den baile moderno.

E aña aki un total di mas di 10 scol a participa caminda tabata tin representacion di scolnan special, preparatorio, basico y avansa presentando nan show di baile cu un coreografia prepara especialmente pa e competencia aki. Minister Maduro a desea tur scol, - participante, -docente y dirigente di baile hopi exito. Como tambe e cuerpo di hurado cu nan gran responsabilidad.



Tabata tin un bunita programa prepara cu presentacion di grupo Tipico, Grupo di Baile y nos artistanan na unda tur esnan presente por a disfruta di esaki. No por a keda sin falta e tentnan cu a ofrece nos dushi cuminda, boca dushi y artesanía local.

Pa Minister Maduro e evento aki a musta e union di talentonan di nos scolnan caminda nos hobenann ta bini hunto y a ta competi sanamente. Minister di Cultura a gradici su colega Minister di Enseñansa y Deporte Endy Croes, tur departamentonan di Gobierno, IBISA, Departamento di Cultura, CCDN, Comision encarga cu e organizacion di Weganan Escolar 2023 y boluntarionan cu a yuda pa por a haci e competencia di Baile Deportivo y Cultural Escolar 2023 un exito grandi. Danki na tur scol y alumnonan cu a participa y especialmente e scolnan ganador. Masha danki pa biba nos Cultura.





POTRETNAN DI COMPETENCIA  
DI BAILE WE ARUBA 2023







POTRETAN DI COMPETENCIA  
DI BAILE WE ARUBA 2023







## E FIRST CALL DI MARDI GRAS A TRECE UN RECORD DI 6348 TURISTA CRUCERO ARUBA

Diamars tabata un dia cu hopi movecion turistico pa nos centro di ciudad debi na e prome call di e barco crucero Mardi Gras. Minister di Turismo sr. Dangui Oduber ta satisfecho di mira un otro mega crucero pa prome bes na nos waf. E mega crucero aki ta pertenece na Carnival Cruise Lines y a yega nos isla cu 6348 turista crucero riba dje. Nunca antes un crucero a yega Aruba cu asina hopi pasahero. Un otro barco crucero esta Carnival Horizon tambe ta den nos waf, mas di 11 mil turista crucero awe den Oranjestad. Esaki sigur ta refleha e maneho di turismo di Ministerio di Turismo.

Mardi Gras ta un di e mega cruceronan mas grandi y mas moderno di e Carnival Cruise Lines. E por acapara 6500 pasahero, tin un total di 19 deck y ta midi 345 meter di largo. Locual ta hopi importante ta cu e barco cu su motornan ta traha riba "Liquid LNG", cu ta un sistema hopi limpi pa cu nos medio ambiente. Danki na e vision di Gobierno cu a haci e inversionnan y preparacionnan necesario, nos ta ricibiendo varios di e mega cruceronan aki awo.

Minister Oduber a menciona cu hopi di e barconan ta cambiando uzo di diesel pa "Liquid LNG" cu ta e futuro pa e barco cruceronan y ta parti di e vision di APA. E meta ta pa den futuro e barconan crucero por tank e "Liquid LNG" aki na Aruba mes. Pa haci esaki posibel Gobierno y APA a cera un acuerdo cu e Jaxport pa den futuro nan suministra Aruba cu e "Liquid LNG".

Nos turismo crucero den e prome 5 lunanan a registra un crecimiento di 17% compara cu e mesun period di aña 2019. E proyeccion ta cu APA ta bay clausura aña 2023 cu un recuperacion di entre 95% pa 100% den comparacion cu aña 2019. Segun minister Oduber esaki ta hopi bon si tene den consideracion cu nos turismo crucero a cuminsa bek hopi mas despues cu nos turismo aereo.

Gobierno ta haciendo tur lo necesario pa sigui stimula nos economia. Tin proyectonan grandi na caminda pa mehora producto Aruba. Un di nan ta na e ex edificio di DOW caminda lo bay converti esaki den un Visitor Inspiration Center specialmente pa nos turistanan crucero. Turismo ta keda e driver di nos economia.







*Geoffrey Wever*  
MINISTER

## TA INFORMA PARLAMENTO DI ARUBA DI TRADE MISSION COLOMBIA



Riba 13 di juni 2023 Minister Geoffrey Wever a entrega Parlamento di Aruba e relato “Verslag Handelsmissie Aruba-Colombia” den cuadro di e mision comercial pa Colombia. Un mision comercial cu a tuma lugar den e periodo di 23 pa 27 di mei 2023 y cu e mandatario a lidera y acompaña pa Camara di Comercio y un delegacion di 15 compania di Aruba. Consejo di Minister di Aruba a trata y aproba e relato riba mesun dia 13 di juni 2023.

Cu entrega di e “Verslag Handelsmissie Aruba- Colombia” na Parlamento di Aruba minister Geoffrey Wever ta informa nos parlamentarionan como representantenan di nos ciudadanonan riba su programa diario durante e mision comercial.

Minister Geoffrey Wever su programa diario tawata consisti di reunionnan cu diferente stakeholders den cual a trata diferente tema pa logra mas comercio y mas inversionnan entre ambos paisnan.


E mision comercial pa Colombia ta forma parti di e maneho economico di Aruba inclui den e programa di gobernacion 2021-2025 y ta un instrumento importante pa fortifica e cooperacion economico entre e dos paisnan, facilita cu nos negoshinan tin mas acceso na e mercado Colombiano y stimula cu nos consumidornan tin mas choice den productonan y servicio.



Entrega di e “Verslag Handelsmissie Aruba- Colombia” na Parlamento ta nifica cu e mision comercial a tuma lugar pero cu awor e fase di ehecucion ta start di loke a keda palabra durante e mision economico.

Ministerio di Asuntonan Economico, Comunicacion y Desaroyo Sostenibel a traha un plan di accion basa riba tur palabracionnan hasi durante e mision comercial.


Ta importante pa nos como pais haci bon uzo di e oportunidadnan economico cu Colombia ta brinda nos y pesey awor mi ministerio lo enfoca riba ehecucion di tur e accionnan cu e mision comercial a trece. Un mision comercial ta un inversion haci pa beneficio di nos comerciantenan y consumidornan y pesey ta di sumo importancia pa duna contenido concreto na nos esfuerzo pa logra como resultado mas comercio y inversion entre Aruba y Colombia cu ta na bienestar di ambos pais segun minister Geoffrey Wever.







## CBS Y KPA LO COLABORA PA ASINA POR TRAHA MAS A BASE DI INFORMACION Y INTELIGENCIA





Den cuadro di e plan strategico di Ministerio di Husticia y Asuntonan Social, Minister di Husticia y Asuntonan Social sr. Rocco Tjon a reuni cu Alto Comisario sr. Ramon Arnhem y Directora di CBS, sra. Desiree Helder, pa asina sondea posibilidad di traha mas di serca cu otro a base di informacion y inteligencia pa eleva seguridad pa comunidad, pero tambe di e Agente Policial.

Conforme e plan di maneho e enfoke ta riba informacion y inteligencia. Pues, pa duna contenido real na "intelligence led" of "informatie gestuurd" werken.

Pa por logra esaki mas aun, e ta importante pa sera aliansanan cu departamentonan gubernamental pa por asisti otro y haci uzo di informacion cu ta disponibel den cada organisacion.

CBS tin hopi informacion y experticio disponibel pa yuda Cuerpo Policial provee mas productonan di informacion. Esaki lo por yuda nos preveni criminalidad y percura cu Cuerpo Policial por traha na un capacidad mas eficiente y eficaz. Ademá di esaki, e ta percura tambe pa productonan di informacion pa Cuerpo Policial, pa asina eleva seguridad di e propio Agentenan Policial.

E mandatario ta wak bek riba un bon reunion, caminda pronto lo formalisa e colaboracion entre CBS y Cuerpo Policial.







## MINISTER ENDY CROES, MINISTER DANGUI ODUBER Y DR BUSARI A BISHITA COLEGIO SAGRADO CURASON, EN CONEXION CU E PROYECTO DI SCOL SALUDABEL



Dialuna mainta, Minister Endy Croes hunto cu colega Minister Dangui Oduber y dr. Busari a bishita Colegio Sagrado Curason den cuadro di e proyecto Scol Saludabel. Colegio Sagrado Curason ainda no ta participando den e programa di Scol Saludabel, pero si ta aplica un estilo di bida saludabel pa su alumnonan. Minister Dangui Oduber, Minister Endy Croes y dr. Busari a combersa cu e alumnonan y a splica di e importancia di come saludabel. Scol Saludabel ta un proyecto cu ta forma parti di e Plan Nacional di Prevencion contra malesanan no transmitibel pa conscientisa, informa y educa comunidad pa

hiba un bida saludabel y e importancia pa practica deporte. Ministerio di Salud, Ministerio di Enseñansa y Deporte y Ministerio di Asuntonan Social ta promove e proyecto aki.


E alumnonan a pone hopi atencion y na final di e charla e alumnonan a ricibi un brochure cu informacion di Minister Endy Croes y Minister Dangui Oduber. Concluyendo, Minister Endy Croes a indica cu lo sigui bishita scol den transcurso di e simannan nos dilanti pa hiba e mensahe pa come saludabel y e importancia pa haci actividad fisico.



# MINISTER ENDY CROES A BISHITA E EXITOSO JOB FAIR 2023

Diamars mainta, Minister Endy Croes a bishita Job Fair 2023 organisa pa Aruba Food & Beverage Association (AF&BA). Na Job Fair tabatin alrededor di 50 restaurant y bar presente cu a ofrece 400 cupo di trabou. Scolnan a asisti parti mainta y despues pueblo di Aruba por a bishita e Job Fair. E personanan cu a bishita Job Fair por a colecta informacion y scoge e trabou cu mas ta pas cu ne. Bishitando e Job Fair sigur tabata un manera perfecto pa conoce e posicionnan di trabou disponibel y por a papia directamente cu e representante di e compania.

Gianni's Group y Aruba Wine & Dine ta e dos companianan mas grandi den "food & beverage" na Aruba. Openbare Avondleergangen Aruba (OAA) tambe tabata presente na e Job Fair. OAA den colaboracion cu AF&BA por brinda estudionan pa prepara y educa esnan cu ta interesa pa mercado laboral den e sector "food and beverage". Concluyendo, Minister Endy Croes a enfatisa cu e Job Fair ta un bunita iniciativa y bon organisa. Palabranan di pabien na AF&BA y tur e companianan cu a participa.







# ARUBA CANANDO E CAMINDA DI ENERGIA LIMPI DEN NOS TURISMO CRUCERO

**Mardi Gras su motornan ta traha riba "LNG" cu ta un sistema limpi  
pa nos medio ambiente**

Diamars mainta, a drenta Aruba e barco crucero Mardi Gras, cu ta un mega crucero cu ta pertenece na e cadena di Carnival Cruise Lines. Loke ta remarcabel ta, cu e crucero aki su motornan ta traha riba "LNG" – Liquid Natural Gas, cu ta un sistema limpi pa nos medio ambiente. Esaki sigur, ta duna un sentimento di gratificacion na Minister Glenbert Croes, mirando cu su vision desde inicio di su carera como Minister di Energia, ta pa logra pa Aruba opera a base di energia limpi.

Nos Minister President di Aruba, Evelyn Wever Croes durante cu e tabata e Minister encarga cu Energia a cana full un proceso habri y transparente pa finalmente por a yega na e National Energy Policy oficial di Pais Aruba. Minister Glenbert Croes na su turno, honrando e National Energy Policy, a traha incansabel, reuniendo cu varios companianan internacional, pa asina logra comberti Aruba den e prome pais den e region Caribense pa opera a base di energia limpi. A logra yega na un acuerdo cu Eagle LNG pa cuminsa cu e proceso di transicion di "HFO" pa "LNG", cual lo ta di gran beneficio pa pais Aruba, mirando cu na momento cu transiciona riba LNG, prijsnan di combustibel, awa y coriente lo baha inmediatamente. Tambe lo exporta parti di e LNG cu lo genera mas divisa y desaroyo economico pa Aruba.

Pa loke ta turismo crucero ta importante pa remarca cu varios barconan ta cambiando uzo di diesel pa "LNG". Y Aruba por bira un puerto unda cu cruceronan por 'refuel' e barco cu LNG.

Minister Croes ta satisfecho cu tur e desaroyonan cu tin andando pa loke ta e transicion di "HFO" pa "LNG" ya cu cada logro pa comberti Aruba, den un pais cu ta opera a base di



energia limpi, ta un logro mas pa e lucha na bienestar di e comunidad y su medio ambiente.

Minister Croes ta felicita Minister di Turismo Dangui Oduber cu su maneho exitoso. Den union y positivismo, nos ta logrando cosnan grandi pa Aruba su recuperacion economico di cual turismo ta e factor mas importante pa nos por logra esaki pa nos Pais.



# Confirmando e vision di Minister Glenbert Croes: **HULANDA Y ESPAÑA A FIRMA DIFERENTE ACUERDO RIBA TRANSICION ENERGETICO PA HIDROGENO**

Recientemente Minister Glenbert Croes, den su meta di haci di Aruba e prome Hydrogen Valley den Caribe, a anuncia cu Acciona Energia di Spaña y Utilities, WEB, ELMAR y RDA ta yegando na un acuerdo pa cuminsa cu e proceso di negociacion pa por logra Aruba Hydrogen Valley.

Den noticia di cas Real, por a tuma nota cu su mahestad Rey Willem Alexander, kende ta apadrina y sostiene Hidrogeno, hunto cu Minister di Energia di Hulanda sr. Rob Jetten, a biaha e siman aki pa Spaña unda cu diferente acuerdo a keda firma entre ambos pais. Presente pa Spaña tabata su Mahestad Rey Felipe. Meta di e acuerdonan ta pa hunto realisa e potencial cu ambos pais tin pa exportacion di Hidrogeno pa Europa.

Conforme declaracion di Cas Real: “Tur cos ta indica cu Spaña por bira e proveedor importante pa hidrogeno berde pa Europa.” Hunto cu su Mahestad Rey Felipe di Spaña, Rey Willem Alexander a reuni cu stakeholders Spaño reconociendo e oportunidad unico cu ambos pais tin pa bira pioneronan den produccion y exportacion di Hidrogeno pa Europa.

Y un dje companianan Spaño pionero den produccion di hidrogeno berde ta Acciona Energia. E compania aki tin tur interes di asisti Aruba den su transicion energetico y converti nos isla den e prome Hydrogen Valley den Caribe. Y durante e encuentro cu su Mahestad Rey Willem Alexander a sostene cu stakeholders energetico Spaño, e compania Acciona Energia tambe tabata presente. E director Energetico di Acciona Energia, Sra Belen Linares, a informa su Mahestad Rey Willem Alexander di e interes cu nan tin den yuda Aruba bira e prome Hydrogen Valley di Caribe.

Minister Glenbert Croes ta orguyoso y satisfecho, cu e caminda aki cu Aruba a scoge pa encamina, awe basicamente ta conta cu ratificacion di su Mahestadnan Rey Willem Alexander y Rey Felipe. Hidrogeno ta e futuro pasobra ademas di un energia limpi cu lo combati cambio climatico, e spin off economico cu Aruba Hydrogen Valley lo tin pa Aruba, lo percura pa diversificacion di nos economia y estabilidad economico pa nos Pais.

Y e vision ta pa finalmente pueblo di Aruba por gosa di un energia limpi, accesibel y pagabel pa un y tur. Pero e vision y meta mas grandi ta pa Aruba bira e exportador pa region.

Minister Glenbert Croes a expresa: “Nos ta gradici su



Mahestadnan Rey Willem Alexander y Rey Felipe pa apadrina e proceso di hidrogeno y e transicion energetico no solamente den nan Pais pero pa full Europa y pa tur Paisnan cu kier e cooperacion aki. Y den cuadro di esaki mi ta sigur cu Aruba lo conta cu nan apoyo tambe”.





Desaroyo y progreso di un pais ta mas  
sostinibel, fuerte y lihe ora cu cada  
ciudadano di e pais uni den esfuersonan  
y contribui cu positivismo na e vision  
pa logra cosnan grandi pa futuro.

2023 AÑA DI UNION Y POSITIVISMO! \_\_\_\_\_